

春秋集義

卷一

卷二

卷三

卷四

卷五

卷六

卷七

卷八

欽定四庫全書

春秋集義卷四十

宋 李明復 撰

襄公

十有六年春王正月葬晉悼公三月公會晉侯宋公衛侯鄭伯曹伯莒子邾子薛伯杞伯小邾子于溴梁戊寅大夫盟

謝湜曰平公新立會諸侯盟于溴梁繼先君之烈也

大喪未畢而出會諸侯則其惡不待貶而見矣袁僑之盟非諸侯盟宋之盟諸侯不在會故盟稱諸侯之大夫溴梁之盟諸侯在會而大夫受命為盟故盟稱大夫

胡安國曰牡丘之會諸侯既次于匡則書曰公孫敖帥師及諸侯之大夫救徐鷄澤之會諸侯既盟而陳侯使袁僑如會則書曰叔孫豹及諸侯之大夫及陳袁僑盟今溴梁之會諸侯皆在是若欲使大夫盟者

則宜書魯卿及諸侯之大夫盟可也而獨書大夫何也諸侯政失大夫皆不臣也上二年春正月會于向十有四國之大夫也夏四月會伐秦十有三國之大夫也冬會于戚七國之大夫也此三會皆國之大事也而使大夫專之而諸侯皆不與焉是列國之君不自為政弗躬弗親禮樂征伐已自大夫出矣況悼公既歿晉平初立無先公之明也君若贅旒而大夫張亦宜矣豈一朝一夕之故哉善惡積於至微而不可

揜常情忽於未兆而不預謀苟偃怒大夫盟而晉靖公廢趙籍韓虔魏斯為諸侯之勢見矣有國者謹於禮而不敢忽此春秋以待後世之意也

呂祖謙曰人君即位之初便可占知終身之昏明治亂之由晉平公繼悼公之後恃晉國之少安放於奢侈溺於宴安觀其即位之初使羊舌肸為太傅張君臣為中軍司馬祁奚韓襄欒盈士鞅為公族大夫虞丘書為乘馬御改服修官蒸于曲沃警守而下會于

溴梁平公固是無知其初即位能用許多人何故後來衰弱須看他承悼公之後典刑法度尚在畧有可觀固是平公之力亦皆是悼公之餘平公即位之初規模便與悼公別了且悼公即位之初政事用之一國上下煥然一新其初如此後來蕭魚既會之後早是漸衰況平公即位之初規模已不如悼公賴悼公之舊政遺法尚在憑藉扶持平穩安帖至數十年而平公又漸漸昏墮以此知霸業之衰亦可占知於即

位之初其後之霸主強弱昏明治亂亦基於此

晉人執莒子邾子以歸

謝湜曰二國雖為魯難然非有罪惡及民也溴梁之會二國受盟非違命也平公首令諸侯而不以其罪執邾莒失政刑矣晉侯奪爵書人貶之也二子罪非在所絕也執以歸則非屈辱於晉也故雖失位不名齊侯伐我北鄙夏公至自會五月甲子地震叔老會鄭伯晉荀偃衛甯殖宋人伐許

謝湜曰許不與中國會盟故列國伐許

秋齊侯伐我北鄙圍成

謝湜曰齊侯難魯不已故再圍成

大雩冬叔孫豹如晉

十有七年春王二月庚午邾子貜卒

謝湜曰不書卒於晉晉人復釋之故也

宋人伐陳

謝湜曰陳自七年逃歸未與中國會盟

夏衛石買帥師伐曹秋齊侯伐我北鄙圍桃高厚帥師
伐我北鄙圍防

謝湜曰三年之中五伐我北鄙四圍我屬邑兵之暴
亂者也

九月大雩宋華臣出奔陳

謝湜曰君書出奔罪其失國臣書出奔罪君不能治
冬邾人伐我南鄙

謝湜曰邾人又伐南鄙魯之結怨鄰國亦可知也

十有八年春白狄來

謝湜曰白狄以夷禮來朝不成朝禮故直書來

胡安國曰劉敞曰夷狄於中國無事焉其於天子世
一見則諸侯雖善其交際不得而通也是以春秋亦
不與其朝不與其朝者懲淫慝一内外也周公致太
平越裳氏重九譯而獻其白雉公曰君子德不及焉
不享其贄此乃天子而讓也况列國之君乎守藩之
臣乎

夏晉人執衛行人石買

謝湜曰以衛不直而執之則罪不在行人以買伐曹而執之則不當執於行人

秋齊師伐我北鄙

謝湜曰五伐四圍猶復起師

冬十月公會晉侯宋公衛侯鄭伯曹伯莒子邾子滕子薛伯杞伯小邾子同圍齊

程頤曰書同圍見諸侯之惡齊

程氏學曰凡侵伐圍入之類未有言同者獨此書
同圍何哉曰背盟肆暴數伐鄰國諸侯共疾而圍之
啖子曰諸侯同心圍齊特曰同圍是也十有九年盟
于祝柯亦同心故也

謝湜曰齊魯鄰國也齊侯怙險負衆六伐魯北鄙四
圍魯成邑諸侯背盟棄好肆害虐鄰未有過於此者
也兵以好惡為主衆所好者衆欲助衆所惡者衆欲
去齊之不道諸侯惡之甚矣故十有二國同心伐齊

而圍之也書同圍齊以明諸侯疾齊之深也

胡安國曰凡侵伐圍入未有書同者而獨於此書同
圍齊何也齊環背盟棄好陵虐神主肆其暴橫數伐
鄰國觀加兵於魯則可見矣諸侯所共惡疾故同心
而圍之也同心圍齊其以伐致何也見齊環無道宜
得惡疾大諸侯之伐而免其圍齊之罪詞也春秋於
此有沮橫逆抑強暴之意孟子曰國必自伐而後人
伐之自作孽不可逭其齊侯環之謂矣尚誰懟哉

曹伯負芻卒于師

謝湜曰諸侯有社稷人民之重卒書于師謹之也

楚公子午帥師伐鄭

十有九年春王正月諸侯盟于祝柯

謝湜曰諸侯既圍齊於是盟於祝柯盟曰大毋侵小
為齊故也同圍齊義事也諸侯所同欲也善其同圍
齊故盟稱諸侯

晉人執邾子

謝湜曰邾子非以罪在所絕見執故不名溴梁既盟之後晉人執莒子邾子祝柯既盟之後晉又執邾子為天下盟主而首犯盟約非以信諸侯也

公至自伐齊

謝湜曰以伐至圍者以明以義伐齊與不道圍人之國者異也

取邾田自漵水

謝湜曰邾小國也其伐我南鄙正以疆界不明故圍

齊之後晉人執其君魯人取其田春秋正其曲直而
田稱邾邾田書取則疆界不明曲乃在魯而不在邾矣
邾田自鄆水著其取田之多也圍齊義也取邾田不
義也以義討齊之暴復以不義侵邾之疆以亂繼亂
而已故晉執邾子書人邾以田與魯書取所以正其
亂也

季孫宿如晉葬曹成公夏衛孫林父帥師伐齊秋七月
辛卯齊侯環卒晉士匄帥師侵齊至穀聞齊侯卒乃還